

Carta Cha Chino Cha Cuenda Ñáyivi Israel, Ñu Cahán Sahan Hebreo

Nyoo cahán ra chihin yo
chihin yuhu Sehe ra

1 Ta tyembu chahnu cahán Nyoo cuaha xaan chaha, ta cuaha xaan cuhva, chihin sutu chahnu yo, ñu chiyo ta cha naha. Cahán ra chihin yuhu ra cacuvi profeta, ra cha cachaha cuenda tuhun cahán ra. ²Ta vityin nu cua ndihi tyembu ihya, cahán ra chihin yo chihin yuhu Sehe ra. Ta tandihi maa ta natyaá ra ndaha Sehe ra. Hin ri cuví ra chihin Sehe ra ta savaha ra ñuhu ñáyivi. ³Cha cahnu ta cha tyaqui cuví Nyoo iyó chi Sehe ra, vatyí suri ican ra cuví maa maa xiñahñu Nyoo. Ta chihin tunyee iñi tuhun cahán ra, nyisó cuenda ra tandihi cha iyó. Ta cha yahá sandachi ra cuatyí yo, ta chicunyaá ra chiyo vaha Nyoo, ra cha cahnu ca cuví. Ta vityin nyacá ñaha ra chihin ra nya andivi.

Cahnu ca cuví Sehe Nyoo
ta ñima ca ángel

⁴Ta tyicuan caa cahnu xaan ca nanduvi Sehe Nyoo ta ñima ca tandihi ángel. Ta cahnu ca sivi chaha Nyoo chi ra ta ñima ca ángel

cuenda ra. ⁵Vatyí Nyoo ña catyí ra ni noo chaha chi ni noo ángel tyehe caa:

Yoho cuvún Sehi.

Ta yuhu chahí ñáyivi coun vityín.

Ta ni ña cahán ra tuhun ni noo ángel tyehe caa:

Yuhu cucuvi Sutu ra.

Ta maa ra cucuvi Sehi.

⁶Soco quivi saquichi Nyoo chi Sehe nuu ra siqui ñuhu ñáyivi, catyí ra:

Na sacahnu tandihi ángel cuende chi ra.

⁷Ta cahán tucu ra tuhun ángel cuenda ra ta catyí ra:

Sacuví vatyí tatyí cuví ángel cuende,

ta tari yaa ñuhú cuví ra sacuví tyiño nui, catyí Nyoo.

⁸Soco tuhun Sehe ra catyí ra tyehe caa:

Nyoo cuvún, ta cua cunyaca ñahun tyicuan ri maa chihin cha ndaa ta chihin cha ndicha.

⁹Vatyí cuñún cha vaha ta cutasi cuñún cha ña vaha.

Yucuan chaha vatyí yuhu, ra cha cuví Nyoo cuendon, cuaha ca tusii iñi chahí

chuun, ta ñima ca chi ra
tahun.

¹⁰Ta catyí tucu Nyoo chi Sehe ra
tyehe caa:

Yoho, ra nyacá ñaha cuvún. Ta
quivi xihna ri savahun ñuhu
ñayivi ta chihin ndahun
savahun andivi.

¹¹Maa ñuhu ñayivi ta andivi
cundihi chi, soco yoho,
cundoun tyicuan ri maa.

Tandihi maa cuan cu cuchahnu
tari sahma.

¹²Ta cunicava tahnú chi tari noo
vestido.

Ta cunasama chi tari nasamá
ñáyivi sahma ñu.

Soco yoho suri maa ra cuvún
tyicuan ri maa.

Ta ma ndihi maa ñayivun, catyí
Nyoo chi Sehe ra.

¹³Nyoo ni noo chaha ña catyí ra chi
ni noo ángel tari catyí ra chi Sehe
ra tyehe caa:

Cunyaun chiyo vahi nyacua nya
cha caquin chi ra xaan iñi
chuun chahun.

¹⁴Soco tandihi ángel, tatyí cacuvi
ra ta tyaa Nyoo tyiño chi ra cha
caca ra ta tyinyee ra chi ñu cucacu
añima.

**Cahnu xaan cuví tuhun cha
sacacú Nyoo añima chi yo**

2 Yucuan chaha vatyí cuñí chi
cha quichahá xaan ca yo
tuhun ndicha cha chiñi yo, coto
cunuhu yo ityi quiñi caa. ²Ta cha
naha catyí Nyoo chi ángel, na
cuhva ra ley ra chi ra Moisés. Nyoo
catyí ra tyi tahán chi quichaha
ñáyivi. Ta ñu casacuvi cuatyí ta ña
quichahá ñu ley ra, tachi tuñi ra chi

ñu tari cuhva catyí maa ley cuan.

³Cahnu xaan cuhva sacacú Nyoo
añima yo. ¿Yoso caa cucacu añima
yo tatu sacunaa yo cuhva cuan?
Cha xihna ri suri maa Sutu Mañi
yo Jesucristo cahán ra tuhun yoso
caa cuví cacu añima yo. Ta yaha
cuan ta ñu cha cachiñi tuhun cahán
ra, chitó ñu tyi ndicha ta canacatyí
tucu ñu chi maa yo. ⁴Ta siin ri,
Nyoo sañaha cachi ra chi yo chihin
cuaha milagru ta cha iyo, vatyí
ndicha cha sacacú ra chi yo. Ta
chahá ra Tatyí Ii ra chi yo siin siin
cuhva, yoso cuhva cha cuñí maa ra.
Ta chihin tandihi cuan sañaha ra
chi yo vatyí ndicha cha sacacu ra
añima yo.

**Ra Jesucristo cuví ra cha
cua sacacu añima yo**

⁵Nyoo, ña chahá ra cha cunyaca
ñaha ángel chi ñuhu ñayivi chaa
cha cahán yo tuhun vityin. ⁶Vatyí
iyó noo nuu cahán chi nu tutu Nyoo
tyehe caa:

Nyoo Suti ¿yóó ra cuví rayii
vatyí nichon iñun tuhun ra?
¿Yóó ra cuví Sehe ra vatyí tíñ
cuendon chi ra?

⁷Vatyí suhva quivi, ndahvi ca
sacuvun chi ra, ican saha
ángel.

Soco yaha cuan sacahnú xaun
chi ra. Ta sahá xaun ñáyivi
chi ra.

Ta chahun cha cunyaca ñaha ra
siqui tandihi cha savahun.

⁸Tandihi cuan natyaun ndaha ra.
Tandihi maa, Nyoo chahá cha
cunyaca ñaha ra, cuví chi cuan.
Soco nyehé yo vatyí cumañi ca
quichaha tandihi cuan chi ra. ⁹Soco

nyehé yo chi ra Jesús vatyí suhva ri quiví, sanocueē Nyoo chi ra ican saha chi ángel. Soco cha cuenda cha cuñí xaan Nyoo chi yo, chaha cuenda ra chi ra Jesús cha cúvi ra cha cuenda tandíhi yo. Ta vityin sahá xaan Nyoo ñáyivi chi ra ta sacahnú xaan ra chi ra cha cuenda tindoho cha nyehe ra quiví chihí ra.

¹⁰Tandíhi maa cha iyó, cha cuenda maa Nyoo cuví. Ta maa ra savaha. Ta cuñí ra vatyí tandíhi sehe ra ta chi maa ñu cucuvi tandíhi cha tyaquí cha iyó gloria. Ta chihin tindoho cha sanyehe ra chi ra Jesucristo Sehe ra, sacuvaha ra chi ra. Vaha xaan quitá ra.

¹¹Sehe Nyoo cuví chi ra Cristo, ra sacacú ñima ñáyivi. Ta suri sehe Nyoo nanduví chi ñáyivi ñu chinó iñi chi ra. Yucuan chaha vatyí ña cucahan nuu ra Cristo catyí ra yañi ra chi ñu, vatyí iin ri sutu ra chihin ñu. ¹²Vatyí catyí ra Cristo nu tutu Nyoo tyehe caa:

Cucahin tuhun maun chihin yañi.

Ta cucate yaa cuendon nu ndú iin ri ñu.

¹³Catyí tucu ra tyehe caa:

Yuhu cuita iñi chi Nyoo.

Ta catyí tucu ra:

Ihya nyaí chihin sehi, cha chaha Nyoo chi, catyí ra.

¹⁴Ta tandíhi yo cha cuví yo sehe ra, coño ñuhu cuví yo ta yihí niñi yo, yucuan chaha ra Jesús ñandíhi, suri coño ñuhu ta niñi ñáyivi nyiso ra suhva quiví, tacuhva cuví chaa tuhun chihi chi ra, ta tyicuan caa ta satani ra chi cuihna, ra cha chiyo tunyee iñi chi cha cahni chi ñáyivi.

¹⁵Ta tyicuan caa sacacú ra chi ñu

cha yuhví chi tuhun chihi. Chiyo ñu tari noo musu ra ña vaha vatyí yuhví ñu cha cúvi ñu. ¹⁶Cha ndicha vatyí ña quichí tyinyee ra chi ángel, soco chi ñáyivi tata ra Abraham quichí tyinyee ra. ¹⁷Yucuan chaha cuñí chi cha nduvi ra tari ñáyivi, tacuhva cuví ra noo ra ndicha cundahvi cuñi chi yo. Ta tyicuan caa cuví ra tata sutu cahnu cha cuenda yo nuu Nyoo. Ta tyicuan caa ta sacuachiyó ra cuatyí ñáyivi cha cuenda tindoho cha nyehe ra. ¹⁸Vatyí maa maa ra nyehe tindoho quiví nducú nyehe ra ña vaha chi ra, yucuan chaha, vityin cuví tyinyee tucu ra chi maa yo tatu nducú nyehe ra ña vaha chi yo.

Cahnu ca cuví ra Jesús ta ñima ca ra Moisés

3 Yañi, nyoho chaha cuenda ndo chi ndo chi Nyoo. Ta cuví tucu ndo ñu cha nacana Nyoo chii vatyí coo ndo chihin ra andivi. Ta cha cuenda cha nyehe ra Cristo Jesús tindoho tyiño nuu ndo, yucuan chaha, nyehe vaha ndo cuhva vaha iyó ra. Vatyí ican ra cuví ra cha saquichí Nyoo chi vatyí cuví ra tata sutu cahnu cuenda yo cha chinó iñi yo tuhun Nyoo. ²Ta maa ra quichaha ra tandíhi cha catyí Nyoo cha sacuvi ra, tari quichaha tucu ra Moisés ta cha naha, ta sacuvi ra tyiño cha tahan chi sacuvi ra nuu ñáyivi sehe Nyoo. ³Ta ra Jesucristo cahnu ca ra cuví ra, ta ñima ca ra Moisés. Vatyí noo ra cha savahá vehe, cahnu ca cuví ra ta ñima ca maa vehe cuan. ⁴Tahan tahan vehe, iyó ra savaha chi chi, soco Nyoo cuví ra cha savaha tandíhi

maa cha iyó. ⁵Ra Moisés, quichaha vaha ra chi Nyoo ta sacuv̄i ra tyiño nuu ra cha cuenda ñáyivi Israel ta cahān ra tuhun cha cusacoto Nyoo nu cuahan ca chi ityi nuu. ⁶Soco ra Cristo ra cuv̄i Sehe Nyoo, suri quichaha vaha ra chi Nyoo ta ican ra nyacá ñaha vehe Nyoo. Ta vehe cuan ican cuv̄i maa yo, tatu sanií ca yo iñi yo cuhun yo ityi nuu chihin Nyoo ta itá iñi yo chi ra nyacua nya nu ndihi, ta tyicuan ri cusii cuñí yo nyatú yo cha cuñihi yo.

**Ñu chinó iñi chi Nyoo,
nyitatú ñu chihin Nyoo**

⁷Yucuan chaha cuñí chi saha cuenda yo chi yo, tari catyí Tatyí Ii Nyoo nuu tutu Nyoo tyehe caa:

Tatu chiñí ndo tuhun cahán Nyoo chihin ndo vityin,

⁸ma sandava ndo añima ndo, tari sacuv̄i ñu ña quichaha chi Nyoo quiv̄i canducú nyehe ñu chi ra nu chicā noo ñu chiqui ndii cuan.

⁹Tyehe caa catyí Nyoo: Ñáyivi cuan nducū nyehe ñu chii, vasi chichi cha uvi xico cuiya nyehe ñu cha sacuv̄i.

¹⁰Yucuan chaha cuxaj̄n chi ñu, ta catyí tyehe caa: “Tyicuan ri chicá uvi iñi ñu, ta ña cuñí ñu coto ñu ityi mai.”

¹¹Yucuan chaha cuxaj̄n chi ñu, ta catyí cachi chi ñu, vatyí ma quihvi ñu nyitatu ñu chihin, catyí Nyoo.

¹²Yañi, saha ndo cuenda chi ndo coto cu ña vaha añima ndo ta coto yoso ri caa ta sandoo ndo chi ra cuv̄i Nyoo nyitó cha cuenda cha ña chinó ca iñi ndo chi ra. ¹³Soco san̄ii

ndo iñi tahan ndo tahan tahan quiv̄i, cha ni ri ca cha chahá ca chi cuhva vityin, tacuhva vatyí ni noo ndo ta ma sandavi ñaha cha quiñi caa chi ndo, ta ndundava añima ndo. ¹⁴Vatyí tatu sanií yo iñi yo chihin Nyoo nyacua nya nu ndihi ñáyivi, yucuan ta iñ ri cuñihi yo cha vaha chihin ra Cristo.

¹⁵Catyí chi nu tutu Nyoo vatyí saha yo cuenda chi yo tyehe caa: Vityin tatu nyoho ta chiñí ndo cha catyí Nyoo.

Ma sandava xaan ndo añima ndo, tari sacuv̄i ñu ña quichaha chii, catyí Nyoo.

¹⁶¿Yóo ñu cha cachiñi tuhun cahān Nyoo ta ña tyasoho ñu? Tandih̄i ñu Israel cha tava ra Moisés Egipto ta cha naha, ican ñu cuan. ¹⁷Ta ¿yóo chi cuxaān Nyoo chichi cha uvi xico cuiya? Suri chi ñu cuan, ñu cha chicoo cuatyí. Ta cachihi ñu nu chiqui ndii nu chicā noo ñu. ¹⁸¿Ta yóo chi catyí cachi Nyoo tyi ma quihvi ñu, cunyitatu ñu chihin ra? Chi ñu cha ña tyasoho nu cahán ra. ¹⁹Nyehé yo vatyí ña cuv̄i quihvi ñu cuan vatyí ña chino iñi ñu chi ra.

4 Yucuan chaha, cha ni ri ca cha iyó ca quiv̄i cuv̄i quihvi yo cunyitatu yo chihin Nyoo, cuñí chi saha yo cuenda coto ma cuvi quihvi nya noo nyoho nu cunyitatu yo chihin Nyoo. ²Vatyí chiñi tucu yoó tuhun Nyoo cha sacacú ra añima yo, tari chiñi maa ñu Israel cuan. Soco ñahri maa tuhun cha chiñi ñu, vatyí chiñi ndii ri maa ñu, ta ña chino iñi ñu. ³Soco yoó cha chinó iñi yo, ican yo cuv̄i ñu quihvi nyitatu chihin Nyoo. Ta cha cuenda

ñu ña chinó ñi cuví chi tari catyí Nyoo tyehe caa:

Yucuan chaha cuxaïn chi ñu ta catyí cachi chi ñu vatyí ma quihví ñu nyitatu ñu chihin, catyí Nyoo.

Soco cha nyaá nu nyitatu yo chihin Nyoo vatyí nyitatu Nyoo cha sandihí ra tyiño sahá ra nyata savaha ra ñuhu ñayiví. ⁴Vatyí yihí nu catyí chi nu tutu Nyoo cha cuenda quívi cu ucha nu ndihí vitya. Tyehe caa catyí chi:

Nyoo nyitatu ra nu cu ucha quívi, vatyí ndihí tyiño sahá ra.

⁵Ta inga tucu chaha catyí chi nu tutu Nyoo tyehe caa:

Ni noo quívi ma quihví ñu nu cunyatatu ñu chihin, catyí Nyoo.

⁶Ñu cuan, ñu cha xihna ri cachiñi tuhun cha sacacú Nyoo ánimo yo, ña quihví ñu cha cuenda vatyí nacahnú ñu nu cahán Nyoo. Soco nyaá cha quihví inga ñu. ⁷Vatyí cha yahá nacahnú ñu Israel cuan nu cahán Nyoo, natyaá tucu ra cuhva vatyí nya inga quívi cuví quihví yo cunyatatu yo chihin ra, ta ican cuví quívi vityin. Ta cahán Nyoo tuhun quívi vityin chihin cha catyí ra David. Nyaá chi nu tutu Nyoo tyehe caa:

Vityin tatu nyoho ta chiñí ndo cha catyí,

Ma sandava xaan ndo ánimo ndo, catyí Nyoo.

⁸Tyehe ta chinyacá ra Josué chi ñu Israel cuan nu cunyatatu ñu chihin Nyoo, ma cahan ca Nyoo inga chaha tuhun cha cuenda inga quívi.

⁹Soco nyaá ca nu cuví nyitatu ñu

yihí cuenda Nyoo chihin ra. ¹⁰Vatyí ñu quihví nyitatu chihin Nyoo, ña chicá ca ñi ñu soco nyitatu ánimo ñu tari nyitatu Nyoo quívi ndihí tyiño saha ra. ¹¹Cuñí chi saniñi yo chinó ñi yo chi Nyoo tacuhva cuví nyitatu yo chihin ra, coto yoso ri caa nya noo nyoho sacuvi ndo tari sacuvi ñu Israel cuan vatyí ña cuñí ñu chino ñi ñu chi ra.

¹²Vatyí tuhun Nyoo, nyitó chi, ta iyó tunyee ñi chi chi. Ta xaan ca chi ta ñima ca mityi cha xaan ninduvi chiyo yuhu, ta nyee chi nyacua nya chichi ánimo yo ta nyacua nya chichi cha chiñi tuñi xiñi yo, nyacua nya chichi tuhun xehe cha caá ánimo yo. Ta sañahá cachi Nyoo ñáá cha chicá ñi yo ta ñáá cha caá ánimo yo tatu vaha o ña vaha. ¹³Ñahri maa cha savaha Nyoo ta cuví tixehe nuu chi chi ra. Tandihí maa ta nyehé ra. Ta chi ra nyaá nacuhva cuenda yo cha sacuvi yo.

Ra Jesús cuví ra tata sutu cahnu cha cahán chaha yo nuu Nyoo

¹⁴Ra Jesús Sehe Nyoo, cuví ra tata sutu cahnu cha cuenda yo, vatyí quihví ra nuu Nyoo ta cahán ra chaha yo. Yucuan chaha cuñí chi cha ma sandihí yo cha chinó ñi yo chi ra. ¹⁵Vatyí ra cuví tata sutu cha cuenda yo cuví naquehen ndahvi ra chi yo tatu cuihya cuñí yo chihin Nyoo, vatyí chitó tucu maa ra cha cuví tindoho cha nyehe yo vatyí nyehe tucu maa ra tandihí nuu tindoho, sahá ra ña vaha cha nducu nyehe ra chi ra, soco maa ra Jesús, ñahri cuatyí ra chicoo. ¹⁶Yucuan chaha cuví tuhva yo nuu nyaá Nyoo

ta cahan yo chihin ra chihin cha ña yuhví yo vatyí cuñí xaan ra chí yo, ta ndahví cuñí ra nyehe ra chí yo. Ta cha cuenda cha vaha ñáyívi cuví ra, tyinyeé ra chí yo nu nyehe yo tindoho.

5 Tandíhi ra cuví tata sutu cahnu ca cuenda ñu Israel, ñáyívi cuví ra. Ta na cachí Nyoo chí ra vatyí cahan ra chaha tandíhi ñu nuu Nyoo, ta cuhva cuenda ra cha chahá ñu chí Nyoo, ta cahñi ra quití cha cuenda cuatyí ñu. ²Ta suri vachi quívi ndahví cuñí ra cacuví sutu cha nducú nyehe ra ña vaha chí ra, yucuan chaha cuví cundahví cuñí ra nyehé ra chí ñáyívi ña chitó maa, ta tyinyeé ra chí ñu quita caxiin ityi vaha Nyoo, na ndu uvi iñi ñu cuatyí ñu. ³Ta cha cuenda cuatyí maa ra ta cha cuenda cuatyí ñáyívi, cachahñí ra quití ta chahá cuenda ra chí Nyoo na cahnya ra cuatyí ñu.

⁴Yori sacuvi ri maa sutu chí. Maa Nyoo cuví ra canā chí ra, ta chahā ra cha cuví ra tata sutu, tari sacuví ra chihin ra Aarón ta cha naha. ⁵Ta tyicuan caa tucu ra Cristo, ñima maa ra sacuví ra sutu chí ra, soco maa Nyoo chahā cha cuví ra, tari catyí maa ra tyehe caa:

Yoho cuví Sehi.

Yuhu chahí ñayiví coun vityin, catyí Nyoo chí ra Cristo.

⁶Tari catyí tucu ra chí ra nu inga nu cahán chí tyehe caa:

Yoho cuvún tata sutu tyicuan ri maa.

Cuvún tari ra Melquisedec.

⁷Ta quívi chíyo ra Cristo ihya síqui ñuhu ñayiví, chican tahví ra chí Nyoo, ta chacū chaa ra ta

cahan ra chihin Nyoo vatyí ican ra cuví ra iyó tunyee iñi chí chii cha sacacū chí ra ndaha tuhun chíhi. Ta Nyoo chíñi ra tuhun cahan ra vatyí sacuví ra tandíhi cha catyí Nyoo. ⁸Yucuan chaha vasi Sehe Nyoo cuví chí ra Cristo, soco cutuhvā ra cha quichaha ra chí Nyoo chihin cha nyehe ra tindoho. ⁹Ta cha yahā cha sacuvahā Nyoo chí ra, tyicuan ta cuví ra ra sacacú añima ñáyívi tacuhva coo ñu chihin Nyoo tyicuan ri maa, tandíhi ñu cha quichahá tuhun cahán ra. ¹⁰Vatyí Nyoo tyaā tyiño chí ra cha cuví ra tata sutu cahnu, tari ra Melquisedec.

Yica xaan cha sandihí yo cha chinó iñi yo tuhun Nyoo

¹¹Cuaha xaan nyaá cahan yo síqui tuhun ihya, soco yíi xaan nacatyí yoso caa cuahan, vatyí nyoho ña cuñí ndo cutuñi iñi ndo. ¹²Chahaha xaan chinó iñi ndo chí Nyoo, cuñí chí cha cuví ndo ra sacuahá ta sañaha ndo chí inga ñu. Soco nyoho ni cuñí chí cha nacatyí tucu ndi inga chaha chí ndo tuhun chaxihna ri chíñi ndo tuhun Nyoo. Tari cha lee cuví ndo chihin tuhun Nyoo, vatyí tari cha chaxin ca ndo cha nuu cha cachi ndo nyayu. ¹³Ta ñu cuví tari cha lee cha chaxín, ta chaa ca ñu cutuñi iñi ñu yoso caa coo vaha ñu nuu Nyoo. ¹⁴Soco nyayu vaha cuví chí cha cuenda ñu chahnu chihin tuhun Nyoo: ñu cha cutuñí vaha iñi tuhun ra, nacotó ñu nya cha vaha ta nya cha ña vaha.

6 Yucuan chaha ma ndoo ri yo chihin cha xihna ri cutuhvā yo tuhun ra Cristo, cahun yo ityi

nuu ca tacuhva cuvi yo ñáyivi chahnu chihin tuhun Nyoo. Ma ndoo ri yo chihin tuhun cha yaha cutuhva yo, ta cuñun tuhun cha ma nducu yo cuhva cha cuvaha yo nuu Nyoo chihin cha sacuví yo cha vaha, ta tuhun nachino iñi yo vatyí sacacú Nyoo chi yo. ²Ma ndoo yo chihin tuhun cha yaha sacuvi yo, tari cha condutya yo, tari cha tyisó yo ndaha yo siqui ñu chiñó iñi chi Nyoo na nasoco ra chi ñu, tari tuhun cha cunandoto tandihí ñáyivi cha yaha chihí, ta tari tuhun cha cucutuñi chi tandihí ñáyivi nuu Nyoo ta yihí ñu cahun ñu anyaya tyicuan ri maa. Ma ndoo ri yo chihin tandihí cuan. ³Soco tatu Nyoo ta chaha ra, sacuvi yo ihya: cahun yo ityi nuu ca.

⁴⁻⁶Vatyí ñu cha yaha naquehen cuenda cha ndichin Nyoo noo chaha, chitó ñu cha chahá Nyoo, ta nyaá Tatyí Ii Nyoo chihin ñu. Ta cha chitó ñu yoso caa cha vaha tuhun Nyoo, ta cha ñihi ñu tunyee iñi Nyoo. Ta chihin tunyee iñi cuan cunyaca ñaha Nyoo ñuhú ñayivi chaa. Tatu cha yaha naquehen cuenda ñu tandihí cha vaha cuan noo chaha, ta yaha cuan ta sandihí ñu cha chinó iñi ñu chi Nyoo, ma cuvi ca cha ndu uvi iñi ñu inga chaha. Vatyí suri maa ñu tari cha tyaá ñu chi ra Cristo nu cruzi inga chaha, vatyí chahá ñu cha cuacu nyaá ñáyivi chi ra. ⁷Añima ñáyivi cuví tari noo ñuhú nu sahá tyiño ñu, vatyí noo ñuhú tahan ri chaha cha coon savi, chihí ñuhú cuan ndutya savi cuan. Tatu vaha ñuhú cuan ta vaha cuvaha cha tachí ñu nuu chi, cunasoco Nyoo chi ñuhú

cuan. ⁸Soco tatu cañá iñu ta cañá nyava nuu chi, ñahri maa tuhun. Ta cusoco Nyoo chi ñuhú ña vaha cuan ta cucayu chi. Ta tyicuan caa tucu cucuvi chi ñu cha sandihí cha chinó iñi chi Nyoo.

⁹Yañi, vasi cahán ndi tyicuan caa, soco chitó vaha ndi vatyí nyoho sacuví ndo cha vaha, maa maa ri cha sacuví ñu cha cacú añima sacuví ndo, ta ña sacuví ndo tari ñu cuví tari ñuhú ña vaha cuan. ¹⁰Vatyí Nyoo, ra vaha cuví ra, ta ma naa iñi ra cha sacuví ndo. Ta nyehé ra vatyí cuñí xaan ndo chi ñu yihí cuenda Nyoo, vatyí tyinyee ndo chi ñu, ta tyinyee ca ndo chi ñu nya vityin. ¹¹Cuñí ndi vatyí na cunií ca iñi ndo nyacua nya quichi Sutu Mañi yo, tyicuan caa ta cuñihi ndo tandihí cha nyatú ndo. ¹²Ña cuñí ndi cha cusuchan ndo, soco saha ndo cuenda chi ñu cha chinó vaha iñi chi Nyoo ta sacuvi ndo tari sacuví ñu. Vatyí ñu chinó vaha iñi chi Nyoo chihin cha cama iñi ñu, ican ñu ñihí cha catyí Nyoo tyi cuhva ra chi yo.

¹³Vatyí ta cha naha catyí Nyoo chi ra Abraham, vatyí cuhva ra noo cha cuhva ra chi ra. Ta Nyoo tyaá ra cuhva cha cuhva ra, ta noo ri tuhun cahán ra vatyí maa ra, Nyoo cuví ra. ¹⁴Ta tyehe caa catyí ra: “Cha ndicha vatyí cunasoco xain chuun ta cuaha xaan sehun cucuhve”, catyí ra chi ra Abraham. ¹⁵Ta ra Abraham chihin cha cama iñi ra, nyatú ra tuhun cahán Nyoo chihin ra, ta tyicuan caa naquehen cuenda ra cha catyí Nyoo tyi cuhva ra chi ra. ¹⁶Tatu noo ñáyivi cuacuhva ñu noo cha cuacuhva

ñu chi tahan ñu ta tyanaha ñu sivi noo ra cahnu ca. Ma chihin yucuan ri. ¹⁷Ta yucuan chaha vatyí Nyoo minoo ri tuhun cahán ra, vatyí cuñi ra cha coto ñáyivi vatyí ndicha tuhun cahán ra, ta ña nasamá ra tuhun cahán ra. ¹⁸Yucuan chaha iyó uvi tahan cha ma cuvi nasama chi. Noo cuví cha catyí Nyoo tyi cuhva ra nyatu chi ra Abraham, ta cha cu uvi, noo ri tuhun cahan ra vatyí maa ra, Nyoo cuví ra. Ta Nyoo ña cahán ra cuendu. Yucuan chaha tandihi yo cha nyañaá yo chi ra, ñi ñi yo cunyeé ñi yo chi ra, ta nyatú yo cha tyaá ra cuhva cha cuhva ra chi yo. ¹⁹Tari noo barcu cha nuhñi noo caa vee, coto cuhun chi chihin tatyí, ta tyicuan caa quihí ñi yo cha sacacú ra Cristo añima yo. Ta cha quihí ñi yo chi ra, nuhñi yo chihin Nyoo ra nyaá inga chiyo cortina, o nya gloria cuví Cuan. ²⁰Vatyí ra Jesús cha quihvi ra yucuan ta nuñá ra ityi nu cuhun yo nu nyaá Nyoo. Ta ican ra Jesús cuví ra minoo tata sutu tyicuan ri maa, tari ra Melquisedec.

**Ra Jesús cuví tata sutu
tari ra Melquisedec**

7 Ra Melquisedec cha cahín tuhun, cuví ra rey ñuu Salém, ta cuví ra tata sutu cuenda Nyoo, ra cuví ra cahnu ca. Quivi cha cuandichi ra Abraham cha chahán ra chicañi tahan ra chihin suhva ra cacuvi rey, ta cuví chasaha ra chi ra, tyicuan ta quita ra Melquisedec ityi nuu ra ta nasoco ra chi ra. ²Ta ra Abraham uchi uchi tinyaa ra siquí cha saha ganaa ra nu chicañi tahan ra, ta chaha ra chi ra

Melquisedec. Ta sivi ra Melquisedec cuan cuñi chi catyí: “Rey, ra cuví ra vaha.” Ta rey ñuu Salem cuan cuví ra, yucuan chaha cuví ra: “Rey vaha cha chahá cha taxi coo añima ñáyivi.” ³Ña catyí tuhun Nyoo yóo cha cuví sutu ra ta sihi ra, ni ña cahán chi tuhun yóo ñáyivi chi ra. Ni ri ña cahán chi tuhun ama cacu ra, ni ama chihí ra. Yucuan chaha cuví ra tari caá Sehe Nyoo, noo tata sutu tyicuan ri maa.

⁴Soco, vityin nyehe ndo yoso cha cahnu cuví ra Melquisedec, vatyí ra Abraham tinyaa ra uchi uchi siquí cha saha ganaa ra chi ra cacuvi rey cuan nu chicañi tahan ra, ta chaha ra chi ra Melquisedec. ⁵Tyehe ta tata ra Abraham cuví ra Melquisedec, ta cuví ra sutu, ma catyí yo tyi ra cahnu ca cuví ra. Vatyí nu cuahan ca chi ityi nuu ta suri maa ley Nyoo saniñi chi ñáyivi tata ra Abraham nacuhva ñu uchi uchi cha saha ganaa ñu chi ra cacuvi sutu tata ra Leví, vasi tata ra Abraham cacuvi chi ra tari maa ñu. ⁶Ta ra Melquisedec, ñima tata ra Leví cuví chi ra, ta ni ñima tata ra Abraham, soco vita ri tyi quehen ra uchi uchi siquí tandihi cha ñihí ra Abraham. Ta nasoco ra Melquisedec chi ra Abraham, ra cha chaha Nyoo promesa chii. ⁷Ta chitó cachi yo vatyí cahnu ca cuví ra cha nasoco cuan, ta ñima ca ra cha nasoco ra chi. ⁸Nyehé yo vatyí cahnu ca ra cuví ra Melquisedec cha nuu inga ra caquehén cuenda uchi uchi siquí cha iyó chi ñáyivi, vatyí rayii ri cacuvi ra cuan, ta tuhva chaa tuhun chihi chi ra. Soco tuhun ra Melquisedec cahán chi

nu tutu Nyoo ta catyí chi tyi ñahri tuhun chihi iyó chi ra. ⁹Ta ra Leví, chihin sehe ra, ra cacuví tata ra Abraham, ican ra cacuví tata sutu cha tahán chi caquehén cha uchi uchi siqui cha iyó chi ñáyivi. Soco tari quívi tyiyahvi tucu ra Leví cuan uchi uchi cha saha ganaa ra chi ra Melquisedec cuví cuan, vatyí ra Abraham tyiyahvi ra. ¹⁰Vatyí ra Leví, tata ra Abraham cucuvi chi ra, vasi ta cacu ca ra quívi chisatahan ra Melquisedec chi ra Abraham.

¹¹Ta ra cacuví tata ra Leví suri tata ra Aarón cacuví chi ra, ican ra cacuví sutu cuenda yo ñu Israel, ta cha cuenda ra cuan quichí ley chahnu Nyoo. Ta vityin tyehe ta cuví nduvaha coo yo chihin Nyoo cha cuenda cha sacuví yo cha catyí ley cuan, yucuan ndicha ña ñiñi ca cha quichí ra Cristo ra cuví tata sutu tari ra Melquisedec, ta ñima tari ra Aarón. ¹²Vatyí tatu Nyoo ta nasamā ra chi ra cuví sutu, cuñi tucu chi cha nasamā ley ñandíhi. ¹³Ta Sutú Mañi yo cha cahán tutu Nyoo tuhun, ñima tata ra Leví ta ra Aarón cuví ra, soco tata inga sehe ra Israel cuví chi ra. Ta ni noo ra vachi tata cuan ta ña tuhvá ra cuví sutu. ¹⁴Vatyí chitó vaha yo vatyí Sutú Mañi yo tata ra Judá, sehe ra Israel vachi ra, ta ra Moisés ñahri maa tuhun tata ra Judá cahán ra quívi cahán ra tuhun ra cacuví sutu.

¹⁵Ta yucuan nyehé vaha yo, vatyí Nyoo natyaā ra inga sutu tari ra Melquisedec. ¹⁶Ñima tari catyí ley quichí ra, vatyí ley catyí chi yóo chi tata cua quichí noo ra cuví sutu, ta ña quichí ra tata cuan, soco quichí ra vatyí iyó cha ndicha ñuhu Nyoo

chihin ra ta ñahri tuhun chihí nyisó ra. ¹⁷Vatyí ican ihya cuví cha cahán Nyoo tuhun ra:

Yoho cuvún tata sutu tyicuan ri maa,

Tari ra Melquisedec.

¹⁸Yucuan chaha sacuachiyo Nyoo ley chahnu cuan vatyí ña cuví maa tyinyee chi chi ñáyivi, ta ña chiñuhú. ¹⁹Vatyí ley cha chahā Nyoo chi ra Moisés, ña sanduvahā maa chi ñima yo. Ta vityin, tyiño nuu ley chahnu cuan, iyó inga tuhun vaha ca cha yíhi ñiñi yo. Ta chihin ihya tuhvá yo chi Nyoo vatyí sanduvahā ra Cristo cuhva coo yo chihin Nyoo.

²⁰⁻²¹Nyoo tyaā ra cuhva ta tyanahā ra vatyí cuhva ra noo sutu cha cahnu ca chi yo. Soco sutu cha iyó vityin ña tyanahā Nyoo quívi tyiso ra chi ra. Vatyí nu tutu Nyoo catyí chi tyehe caa:

Sutu Mañi yo, iin ri tuhun cahan ra, ta ma nasama ra cuhva catyí ra tyehe caa:

“Yoho cuvún Sutú tyicuan ri maa, tari cuví ra Melquisedec”, catyí Nyoo.

²²Yucuan chaha ra Jesús chahā ra noo tuhun vaha ca chi yo, ta ñima ca tuhun cha xihna ri cuan. ²³Vatyí cha cuaha xaan ra cacuví sutu, soco chaa chaa ri tuhun chihí chi ra. ²⁴Soco ra Jesús ñahri tuhun chihi iyó chi ra, ta ña ndíhi tuhun cha cuví ra sutu. ²⁵Yucuan chaha tyicuan ri maa cuví sacacu ra ñima ñu natuhvá chi Nyoo cha cuenda ra, vatyí iyó maa ra tyicuan ri maa, vatyí cacan tahvi ra chi Nyoo cha cuenda ñu.

²⁶Yucuan chaha ra Jesús cuví sutu cha chiñuhú chi yo. Ta maa ra, ii ra, ñahri cha quiñi caa sacuví ra, ta ni ñahri cuatyí ra. Ta ña cutahán ra chihin ñu iyó cuatyí. Ta sucun ca nyaá ra, ican saha andívi. ²⁷Ñima tari inga ra cacuví tata sutu cuan, vatyí cuñi chi cha cacahñi ra chi quití ta cuhva cuenda ra chi Nyoo ndi quívi. Ta cha xihna ri, na naa cuatyí maa ra, ta yaha cuan ta naa cuatyí ñáyivi. Soco ra Jesús noo ri chaha, chaha cuenda ra chi ra chi Nyoo na naa cuatyí tandíhi yo. ²⁸Ley Nyoo cha quehen cuenda ra Moisés, tyisó chi chi ra cacuví nuu chi tata sutu, soco ra iyó cuatyí cacuví ra. Soco yaha cuan ta chaha Nyoo noo tuhun chaa, ta ñin ri tuhun cahan ra. Ta tyiso ra chi Sehe ra cha cuví ra Sutu cahnu ca, ta maa ra cuví ra noo ra vaha tyicuan ri maa.

Natyihí tahan Nyoo tuhun chaa chihin yo quívi chíhi ra Jesús cha cuenda yo

8 Ta chichi cha tandíhi cha cahín nu tutu ihya, ican ihya cuví cha niñi ca tuhun: Ra cuví tata sutu cahnu chi yo cuví ra noo ra vaha tyicuan ri maa, ta chicunyaá ra nu tyayu chichi gloria chiyo vaha Nyoo. ²Ta cuví ra Sutu noo nu cuví vehe ñuhu cha ndicha vaha nu nyaá Nyoo. Maa Sutu yo Nyoo savaha vehe cuan, ta ñima rayii. ³Tandíhi ra cacuví tata sutu tyiso Nyoo chi ra, vatyí cuhva cuenda ra ofrenda chi Nyoo ta cahñi ra quití na naa cuatyí ñáyivi chihin niñi ti. Ta yucuan chaha niñi cuñi chi cuhva cuenda tucu ra Jesucristo

niñi ra chi Nyoo. ⁴Tyehe ta siqui ñuhu ñayivi nyaá ra cuví ra sutu, ni ñima sutu cuví ra tatu tyicuan caa. Vatyí siqui ñuhu ñayivi, iyó ca ra cacuví sutu cha cachahá cuenda ofrenda chi Nyoo tari cuhva catyí ley cha tyaa ra Moisés. ⁵Soco ra cacuví sutu siqui ñuhu ñayivi, sacuví ra tyiño nuu Nyoo soco tari cuhva cuví andívi. Cuví chi noo xiñahñu tyiño sahá ra Cristo. Ta chitó yo vatyí tyicuan caa, vatyí quívi cha cua savaha ra Moisés vehe ñuhu cuan ta cha naha, Nyoo catyí ra chi ra tyehe caa: “Saha vaha cuenda, ta savahun tari cuhva caá cha sañahi chuun quívi chinyaun nu yucu cuan”, catyí Nyoo chi ra. ⁶Soco ra Cristo ra cuví sutu cahnu chi yo, vaha ca cuhva sacuví ra, vatyí cha cuenda maa ra, natyihí tahan Nyoo noo tuhun vaha xaan ca chihin yo, vatyí vaha ca cha cucuhva ra chi yo.

⁷Vatyí tyehe ta cuví cacu añima yo chihin tuhun xihna ri cha natyihí tahan Nyoo chihin yo, ña chiñuhú ca cha natyihí tahan chaa ra tuhun chihin yo cha cu uvi chaha. ⁸Soco Nyoo nyehe ra vatyí ña vaha maa sacuví ñáyivi cuan, ta cahán ra tuhun ñu nu tutu ra tyehe caa:

Cuchaa chi quívi vatyí cunatyihí tahin tuhun chaa chihin ñáyivi Israel ta ñu Judá, catyí Sutu Mañi yo.

⁹Ñima tari natyihí tahin tuhun chihin ñáyivi chahnu ñu, quívi tñin ndaha ñu ta tave chi ñu nuu Egipto.

Vatyí ña sacuví ñu tuhun cha natyihí tahin chihin ñu,

ta yucuan chaha sañe chi ñu,
catyí Sutu yo Nyoo.

¹⁰ Tuhun cha cunatyihí tahn
chihin ñu ñuu Israel nu
cuahan ca chi, tyehe caa
cucuvi, catyí Sutu Mañi yo:
Chichi cha chiñi tuñi xiñi ñu,
cutyai ley mai, ta chichi
añima ñu cutyai.

Tyicuan ta mai cucuvi Nyoo ñu,
ta maa ñu cucuvi ñu ñáyivi chii.

¹¹ Tyicuan ta ña niñi ca cha
sañahá ñu chi tahan ñu, ni
chi yañi ñu, tacuhva vatyí
cohon nuu ñu chi yuhu cha
cuví Nyoo ñu.

Vatyí tandíhi ñu, cucohon nuu
ñu chii,

nyacua nya ñu luhlu ca ta
nyacua nya ñu chahnu ca.

¹² Ta cusahi ticahnu iñi cha quiñi
caa cha sacuví ñu.

Ta ma nicohon ca maa iñi
cuatyí ñu, catyí Sutu Mañi yo.

¹³ Quiví cha cahán Nyoo tuhun cha
natyihí chaa ra tuhun chihin yo,
cuñí chi catyí vatyí cha sacuchahnu
ra cha xihna ri cuan. Ta numi ri
cundihi tuhun cha cuví cha chahnu
cuan.

**Nu sañahá chi yoso caa vehe
ñuhu cha iyó siqui ñuhu ñáyivi
ta vehe ñuhu nu cuví andívi**

9 Quiví natyihí tahan Nyoo
tuhun cha xihna ri chihin
ñáyivi, chahá ra cuhva chi ñu
yoso caa sacahnu ñu chi ra, soco
chichi noo vehe ñuhu cha nyaá
siqui ñuhu ñáyivi ihya. ²Tyehe caa
chinq vehe ñuhu cuan: Chata noo
cortina nyaá cuarto cha xihna ri nu
tayucú cañileru, ta nanyaá mesa nu

catuví pan ii. Ta chicunañi cuarto
cuan Nu Ii. ³Chata cortina cu uvi,
yucuan cuví nu chicunañi Nu Ii
Xaan Ca. ⁴Ta yucuan nanyaá noo
arta xuhun cuaan nu chahmi ra
cutu. Ta nanyaá caja, cha natyihí
tahan Nyoo tuhun chihin yo, ta iñi
xuhun cuaan nicacahnu. Ta chichi
cuan ñoho casitu xuhun cuaan cha
ñoho maná. Ta ñoho yutun cha
natyacú cha chindahá ra Aarón. Ta
ñoho tucu yuu cha nyaá ndi uchi
mandamientu. ⁵Ta siqui caja cuan
nyicú cha tari caa ángel, ta cuñí chi
catyí vatyí nyaá Nyoo yucuan. Ta
chihin ndichin ángel cuan cachasí
ra nu cuví nu tuhva Nyoo sahá ra
ticahnu iñi cuatyí ñáyivi. Cha
vityin ña cuví nacatyí ca ndi siqui
tuhun ihya.

⁶Ta tyicuan caa cuví vehe ñuhu
cuan. Ta ndiquivi ri caqui hví ra
cacuví sutu chichi cuarto cha xihna
ri nu nañí Nu Ii, tacuhva sacahnu
ra chi Nyoo. ⁷Soco cuarto cu uvi
Nu Ii Xaan Ca cuan iyó maa minoo
ra cuví nuu chi sutu, ta yucuan ra
cuví quihvi yucuan, noo chaha cha
noo cuiya. Ta cuhva cha quihvi ra,
cuñí chi cuiso ra niñi quiñi vatyí
cuhva cuenda ra chi Nyoo cha
cuenda cuatyí maa ra ta cuatyí
ñáyivi. ⁸Ta cha tyicuan caa sañahá
Tatyí Ii Nyoo chi yo vatyí, ta cuvi
ca chaa yo nuu Nyoo vatyí ni
nyaá ca cuarto cha xihna ri cuan.
⁹Tandíhi maa ihya cuví chi tari noo
xiñahñu ri cha cuenda tuhun chaa
cha chacun Nyoo vityin: vatyí noo
cha chahá cuenda ñu chi Nyoo ña
tyiñyee chi chi ñu na caca vaha iñi
ñu. ¹⁰Vatyí tandíhi cuhva sacuví ra
cacuví sutu cuan cahán chi maa ri

cuenda ñáá cha cuví cachi ñáyivi, ta ñáá cha cuví coho ñu, ta yoso caa cundundi coño ñuhu ri ñu. Ta catuví cuhva cuan, nyatú chi nya quívi cacun Nyoo inga cuhva vaha ca.

¹¹Soco vityin cha yaha quichí ra Cristo ta maa ra cuví tata sutu cahnu cha cuenda tuhun vaha ca cha chacun Nyoo. Quihví ra chichi vehe ñuhu vaha ca, ta ndí ca, vatyí maa ra cuví sutu. Ta ñima rayí savaha vehe ñuhu cuan o cuñí chi catyí, ñima vehe ñuhu ñuhu ñayivi ihya cuví. ¹²Ra Cristo quihví ra vehe ñuhu nu cuví gloria Nu Ii Xaan Ca. Soco ñima ca cha cuhva cuenda ra ñíni mbee luhlu, o becerro, soco ñíni maa ra chaha cuenda ra. Ta tyicuan caa quihví ra noo ri chaha nu ndíhi tuhun, ta tyicuan caa ta cuví sacacu ra chi yo tyicuan ri maa. ¹³Ñíni toro, ta ñíni ndixihyu, ta ñiyaa becerro cha cachahmí ra nu arta, tuhvá ra catyicú ra chata ñu ca iyó cuatyí, ta coño ñuhu ri ñu sandundi chi cuan nuu Nyoo. ¹⁴Ta tatu tyicuan caa, iñana cha cahnu ca tunyee iñi iyó chi ñíni ra Cristo! Vatyí tyinyee Tatyí Ii chi ra ta chaha cuenda ra chi ra chi Nyoo chihin cha ñahri cuatyí ra. Ta ñíni ra sandachí chi cha ña vaha cha caá añima yo tacuhva ma cuita ca iñi yo ley cha chahá tuhun chihi chi yo, ta tyicuan caa ta cuví sacuvi yo tyiño nuu ra cuví Nyoo nyitó.

¹⁵Yucuan chaha ra Jesucristo cuví ra cha cahán chaha yo cha cuenda tuhun chaa cha natyihí tahan Nyoo chihin yo. Ta cha cuenda cha chihí ra, iyó ticahnu iñi cuatyí cha sacuví yo quívi chinyacá ñaha

tuhun cha xihna ri cuan chi yo. Ta yoó, ñu nacana Nyoo chi cuví yo, cuví naquehen cuenda yo noo cha ma ndíhi ca maa, cha catyí maa ra tyi cuhva ra chi yo. ¹⁶Vatyí tatu iyó noo tutu cha sandoo noo ra chihi, ta catyí tutu cuan ñáá ndíhi cha cuñihi ñáyivi chi ra tatu chihi ra; cuñí chi cha coto vaha ra cuví tyiño tatu ndicha cha chihí ra cha sandoo tutu cuan; tyicuan ta cuví sacaca ra tyiño cuan ta nasacha ra cha tahán chi chi ñu cuan. ¹⁷Vatyí cha ñiri ca cha iyó ra cha sandoó tutu cuan, ma cuvi cundaa tyiño cha quehen cuenda ñu cha tahán chi chi ñu, soco nya cúvi ra, tyicuan ta cuví quehen cuenda ñu. ¹⁸Yucuan chaha chihí quiti ta chatí ñíni ti quívi natyihí tahan Nyoo tuhun cha xihna ri cuan chihin yo. ¹⁹Quívi cuan, ra Moisés sacoto ra tandíhi ley Nyoo chi tandíhi ñáyivi. Yaha cuan ta quehen ra noo sahna cuaha cha chingó chihin ixi mbee ta chihin noo soco yutun cha nañ hisopo, satyí ra nu ñíni becerro ta nu ñíni ndixihyu luhlu, nasacá ra chihin ndutya, ta tyicú ra chata libru ley Nyoo ta chata tandíhi ñáyivi ñandíhi. ²⁰Tyicuan ta quichaha catyí ra chi ñu: “Ican ihya cuví ñíni cha cuví cha ndaa vatyí natyihí tahan Nyoo tuhun chihin ndo”, catyí ra. ²¹Ta suri tyicú tucu ra Moisés ñíni nu cuví vehe ñuhu cuan, ta siquí tandíhi cha cachotyíno ra yucuan nu casacahnú ra chi Nyoo. ²²Tyicuan caa sacuví ra vatyí catyí ley Nyoo tyi tandíhi ta chihin ñíni, cuñí chi ndundi nuu Nyoo. Ta catyí tucu chi vatyí ma saha Nyoo ticahnu iñi cuatyí tatu ma catí ñíni.

**Niñi ra Cristo, ican cuan
tinyaa cuatyí yo**

²³Ta yucuan chaha cuñi chi cha sacuvi tata sutu tyicuan caa, vatyí ndundi tandihí cuan, vatyí cuví chi noo xiñahñu cha iyó ityi andívi. Soco tandihí cha cuenda ityi andívi, cuñi chi noo niñi vaha ca cha cuhva cuenda yo, ta ñima ca tari niñi quití cuan. Cuñi chi niñi ra Cristo. ²⁴Vatyí ra Cristo ña quihví ra chichi noo vehe ñuhu cha savaha ñáyivi cha cuví xiñahñu ri. Soco quihví ra chichi vehe ñuhu cha ndicha vaha cha cuví gloria. Ta vityin cahán ra chaha yo nuu Nyoo. ²⁵Ra cuví nuu chi sutu cuenda ñu Israel quihví ra Nu Ii Xaan Ca cuan tahan cuiya vatyí cuhva cuenda ra niñi cha ñima niñi ra cuví. Soco ra Cristo, ña cuaha chaha cuñi chi cuhva cuenda ra chi ra. ²⁶Vatyí tyehe ta tyicuan caa, cuaha chaha cuñi chi cha nyehe ra tindoho ta cúvi ra nyata chinqo ñuhu ñáyivi ta nya vityin. Soco vityin cha cua cuyatyin cundihi tuhun ñáyivi, noo ri chaha quichi ra Cristo, ta chaha cuenda ra chi maa ra tacuhva vatyí cuví tinyaa ra cuatyí yo. ²⁷Noo ri chaha, cúvi yo ta yaha cuan ta cucutuñi chi yo. ²⁸Ta tyicuan caa tucu ra Cristo, noo ri chaha, chaha cuenda ra chi ra tacuhva tinyaa ra cuatyí cuaha xaan ñáyivi. Yaha cuan ta cuquichi ra cha cu uvi chaha, ñima ca cha quichi tinyaa ra cuatyí, soco cha quichi sacacu ra chi ñu cha nyatú chi ra.

10 Vatyí ley Nyoo cha tyaa ra Moisés, cuví chi tari noo xiñahñu ri, cha cuenda cha vaha ca

cha cuquichi. Soco ñima maa cha ndicha vaha cuví. Vatyí ley cuan, ma cuvi maa sanduvaha chi chi ñu nanducú chi Nyoo. Vatyí tahan cuiya ri chahá cuenda ra cuví nuu chi tata sutu cuenda ley chahnu niñi quití. Soco ma cuvi cacu ñima yo chihin cuan. ²Vatyí tyehe ta cuví sanduvaha ley cuan chi ñu, cundihi tuhun cha chahá cuenda ra niñi ndicuiya ri. Vatyí tatu cha ndundi ñu noo chaha cha cuenda tandihí maa, ma caca ca xiñi ñu vatyí iyó cuatyí ñu ta ña chiñuhú ca cha cuhva cuenda ra inga chaha. ³Soco tahan cuiya ri chahá cuenda ra niñi, ta ican cuan sanicohón chi iñi ñu vatyí iyó cuatyí ñu. ⁴Vatyí niñi toro ta niñi ndixihyu, ma cuvi maa tinyaa chi cuatyí yo.

⁵Yucuan chaha ra Cristo, quivi cuaquichi ra siqui ñuhu ñáyivi ihya, catyí ra chi Nyoo tyehe caa:

Na cuñún cha cahni ñáyivi quití ta cuhva cuenda ñu chuun, yucuan chaha savahun noo coño ñuhu chii.

(Vatyí tyicuan caa ta cuví cuhva cuende chii chuun.)

⁶Ta vatyí ña tahán iñun cha cahmi ñu quití ta cuhva cuenda ñu chuun cha cuenda cha tinyaa cuatyí ñu.

⁷Catyí yuhu: “Ma yuhu, vachi ihya vatyí sacuvi cuhva cuñún, Nyoo Suti, tari cuhva cahán chi tuhun nu libru ley maun”, catyí ra Jesucristo.

⁸Cha xihna ri, catyí ra Jesucristo vatyí Nyoo, ña cuñi ra cha cuhva cuenda ñu chi quití chi ra. Ni cha cahmi ñu quití cha cuenda cha

tinyaa cuatyi ñu, ña cuñi Nyoo, catyí ra. Vasi maa ri tuhun cha catyí ley chahnu vatyí sacuví yo cuví, soco ña tahán iñi Nyoo, catyí ra. ⁹Ta yaha cuan ta catyí tucu ra: “Ma yuhu vachi ihya, vatyí sacuvi cuhva cuñún, Nyoo Suti.” O cuñi chi catyí, sacuachiyó Nyoo cuhva chahnu cuan, ta nacuvi chi inga cuhva chaa ihya. ¹⁰Nyoo sandundií ra chi yo vatyí ra Jesucristo sacuvi ra cuhva cuñi Sutu ra, ta chaha cuenda ra coño ñuhu ra. Noo ri chaha chihí ra ta ndihí tyiño saha ra.

¹¹Tandihí ra cacuví tata sutu ñuu Israel, ndi quivi sacuvi ra tyiño nuu Nyoo, ta tyicuan ri chaha cuenda ra suri maa cha tuhvá maa ra chahá cuenda chi Nyoo, vasi ña cuví tinyaa chi cuatyi yo. ¹²Soco ra Jesucristo, noo ri chaha chaha cuenda ra chi ra chi Nyoo cha cuenda cuatyi yo. Tyicuan ta chicunyaá ra tyayu gloria chiyo ndaha vaha Nyoo. ¹³Ta yucuan nyatú ra nyacua nya cacun Nyoo chi ra xaan iñi chi ra chaha ra. ¹⁴Vatyí chihin noo ri chaha cha chihí ra Cristo ta cuví sanduvaha ra añima ñáyivi cuenda Nyoo, tyicuan ri maa. ¹⁵Ta suri tyicuan caa catyí tucu Tatyí Ii Nyoo chi yo. Vatyí cha xihna ri catyí ra chi yo nu tutu tuhun Nyoo tyehe caa:

¹⁶Tuhun cha cunatyihí tahin chihin ñu quivi cuan, tyehe caa cucuvi, catyí Sutu Mañi yo:

Cutyai ley mai chichi añima ñu, ta cutyai chichi cha chiñi tuñi xiñi ñu, catyí Nyoo.

¹⁷Ta yaha cuan ta catyí tucu ra:

Ma nicohon ca maa iñi cuatyi ñu, niri cha quiñi caa cha chinyacuví ñu, catyí Sutu Mañi yo.

¹⁸Ta cha yaha saha saha Nyoo ticahnu iñi cuatyi, ña cuñi ca chi cha cahñi ñáyivi chi quiti, ta cuhva cuenda ñu chi Nyoo cha cuenda cuatyi ñu.

Cuñi chi nanducu yo chi Nyoo

¹⁹Yucuan chaha yañi, cuví quihvi maa yo Nu Ii Xaan Ca cuan nu nyaá Nyoo, cha cuenda vatyí cha chatí niñi ra Jesucristo ta tinyaa ra cuatyi yo. ²⁰Cha nuña ra Cristo noo ityi chaa, ityi cuhun yo nu conyito añima yo. Vatyí maa maa cuhva cha chihí ra ta ndata cortina cha chasi nu chinyaá Nyoo. Cha tahnya cortina, ican cuví cha chihí ra, tacuhva nuña ityi quihvi yo ta chaa yo nu nyaá Nyoo. ²¹Ra Jesús cuví sutu cha nyacá ñaha nu cuví vehe Nyoo andivi. ²²Yucuan chaha cuñi chi nanducu yo chi Nyoo chihin noo cha ndicha ta chihin cha niñi iñi yo chinó iñi yo chi ra, vatyí maa ra sandundií ra añima yo, tacuhva ma quihí ca iñi yo vatyí iyó cuatyi yo, vatyí tari cha nacatya ra coño ñuhu yo chihin ndutya cuii, na ndu ndii yo nu Nyoo. ²³Na cuní ca iñi yo chino iñi yo chi Nyoo ta ma ndu uvi iñi yo vatyí Nyoo cuhva ra cha catyí ra vatyí cuhva ra chi yo. ²⁴Ta cuñi chi nanducu yo cuhva tyinyee yo chi tahan yo, na cuñi ca ñu chi tahan ñu ta sacuvi ca ñu cha vaha. ²⁵Ña tahán chi quehen yo cuhva caá ñu cha sandihí cha quichi nu ndu iin ri yo, soco cuñi chi cha sanduní yo iñi noo noo tahan yo. Ta yaha ca cuhva cuñi chi tyinyee

yo chi tahan yo vityin cha nyehé yo vatyi Sutu Mañi yo cha cuñi chaa quivi quichi ra ta cucutuñi chi tandihi ñáyivi.

²⁶Vatyi tatu cha yahá chichohon nuu yo cha ndicha, ta ña quichahá yo ta tyicuan ri sacuví ca yo cuatyí, ñahri ca cuhva coo ticahnu iñi cuatyí yo. ²⁷Ta cutachi tuñi Nyoo chi yo. Ta cutyihí ra chi yo nu cucayu ñáyivi cha xaan iñi chi ra, ta cundihi tuhun ñu. ²⁸Tatu noo ñáyivi Israel ña quichaha ñu cuhva catyí ley ra Moisés, ta chiyo uvi o uñi testigu, cúvi ñu cuan cha cuenda cuatyí ñu, ta yori cundahvi cuñi nyehe chi ñu. ²⁹Ta nyaca cuví ñu cha ña quichaha ca chi Sehe Nyoo ta sahá ñu tyi niñi ra cha sanduvahá aña ñu cha ñima ri tuhun cuví. Ta chihin niñi cuan natyihí tahan Nyoo tuhun chihin yo. Soco cahán ña vaha ñu siqui Tatyí li Nyoo cha chahá tumañi iñi chi yo. Yaha ca cuhva cutachi tuñi Nyoo chi ñu cuan. ³⁰Vatyi chitó yo vatyi Sutu Mañi yo, ican ra catyí ra tyehe caa: “Yuhu tahán chi tachi tuñi chi ñáyivi, yuhu catyí cha cuví chi ñu.” Ta catyí tucu ra vatyi cutuñi chi ñu nuu ra. ³¹Ndicha cha iyó Nyoo, ta yucuan chaha tahán chi cuyuhvi yo chi ra, coto tachi tuñi ra chi yo cha cuenda cuatyí yo.

³²Soco ma naa iñi ndo quivi natiñ cuenda ndo cha ndichin Nyoo chichi aña ndo, vatyi quivi cuan cunyeé xaan iñi ndo cha nyehé ndo tindoho cha cuenda ra. ³³Yihí nyoho cahán ñáyivi chi ndo, ta sanyehé ñu tindoho chi ndo nu tuvi. Ta yihí nyoho uhvi xaan cuví chi ndo cha nyehé ndo cha cuví

chi tahan ndo cha tyicuan caa, ta cunyeé xaan ndo. ³⁴Ta cundahvi iñi ndo chi ñu ñohó vehe caa, ta chihin cha sii cuñi ndo cunyeé ndo quivi tinyaa ñu cha iyó chi ndo, vatyi chitó ndo vatyi andivi iyó ca cha vaha ca cha cuenda ndo, ta ña ndihí maa cuan. ³⁵Yucuan chaha ma sandihí ndo cha quihí iñi ndo chi ra Cristo, vatyi nu cuahan ca chi ta cuñihí ndo cha vaha ca vatyi chinó iñi ndo. ³⁶Cuñi chi cha coo cha cama iñi ndo tacuhva cuví sacuvi ndo cuhva cuñi Nyoo, ta tyicuan caa ta naquehen ndo cha catyí ra tyi cuhva ra. ³⁷Vatyi nu tutu Nyoo catyí chi tyehe caa:

Ña naha ca ta cuquichi ra cha tahán chi quichi, ta ma cucuee ca ra.

³⁸Ta catyí Sutu Mañi yo tyehe caa: “Ñu cha sanduvahí aña, chihin cha chinó ri iñi ñu chi yuhu, ta conyito aña ñu. Soco tatu cunuhu chata ñu, ma cusii cuñi yuhu chihin ñu”, catyí Nyoo.

³⁹Soco maa yo ña sacuví yo tari sacuví ñu cuanaá aña, vatyi ñu chinó iñi chi Nyoo cuví yo, ta tyicuan caa cucacu aña yo.

Cuhva cuñi chi cha chinó iñi yo chi Nyoo

11 Cha chinó iñi yo chi Nyoo ican cuví cha chitó vaha yo tyi cuñihí yo cha nyatú yo, ta chitó vaha yo vatyi noo cha ndicha vaha cha ña nyehé yo vityin, cuñihí yo vatyi chinó iñi yo chi Nyoo. ²Ñáyivi chiyo ta cha naha, chinó iñi ñu chi Nyoo, ta yucuan chaha quitá vaha ñu nuu ra.

³Cha cuenda cha chinó iñi yo chi Nyoo, ta chitó yo vatyí savahá ra ñuhu ñayiví chihin tuhun cahán ra. Ta chitó yo vatyí tandihí cha nyehé yo vityin, chinq̄ chi ta cha naha chihin cha ña tuhva yo nyehé.

⁴Cha cuenda cha chinq̄ iñi ra Abel chi Nyoo, ta chahá cuenda ra noo cha chahá ra chi Nyoo. Ta vaha ca cha chahá ra ta ñima ca cha chahá ra Caín, yañi ra. Ta yucuan chaha natiñ cuenda Nyoo chi ra tari noo ra vaha, ta natiñ cuenda ra cha chahá ra. Yucuan chaha vasi cha chihí ra Abel, soco tari quiví cahán ca ra tuhun chihin yo vityin, yoso caa tahán chi chino iñi yo chi Nyoo.

⁵Cha cuenda cha chinq̄ xaan iñi ra Enoc chi Nyoo, ta cuanuhú ra chihin Nyoo chihin cha ña chihí ra. Ta ña nañihí ca ñu chi ra, vatyí naquehen Nyoo chi ra. Ta nu tutu Nyoo, catyí chi vatyí cha ni cumañi ca naquehen Nyoo chi ra Enoc, sacuví ra maa ri maa cuhva tahán iñi Nyoo, yucuan chaha naquehen ra chi ra. ⁶Soco ma cuvi sacuvi yo cha tahán iñi Nyoo tatu ña chinó iñi yo chi ra. Vatyí tatu cuñí yo nanducu yo chi ra, cuñí chi cha chinó iñi yo tyi iyó ra. Ta cuñí tucu chi chinó iñi yo vatyí cucuhva ra cha vaha chí ñu nanducú chi ra.

⁷Cha cuenda cha chinq̄ iñi ra Noé chi Nyoo, ta quichahá ra tuhun cahán Nyoo, cha catyí Nyoo chi ra noo cha cucuvi ityi nuu ca. Ta vasi tañaha ca nyehe ra soco cha cuenda cha chinó iñi ra chi Nyoo, ta savahá ra barcu cuan ta sacacu ra chí ñáyivi chi ra. Ta cha cuenda cha chinq̄ iñi ra chi Nyoo, sandoq̄ ra

cuatyí ñu siqui ñu cha ña quichahá chi Nyoo, na tachi tuñi ra chí ñu. Ta cha cuenda cha chinq̄ iñi ra Noé chi Nyoo cuvahá ra nuu ra.

⁸Ta cha cuenda cha chinq̄ iñi ra Abraham chi Nyoo, ta quichahá ra chí ra quiví caná ra chí ra. Yucuan chaha quita ra ñuu ra ta cuahan ra nu cucuhva Nyoo ñuhú cha cundoo chí ra. Quita ra ñuu ra chihin cha ña chitó ra nya cuahan ra. ⁹Cha cuenda cha chinó iñi ra Abraham, yucuan chaha chiyo ra nu ñuhú cha ta cuhva ca Nyoo chí ra. Chiyo ra noo vehe sahama ri, ta suri tyicuan caa tucu ra Isaac, sehe ra, ta ra Jacob, sehe ñañi ra. Vatyí suri catyí tucu Nyoo chí ninduvi ra cuan tyi cucuhva ra ñuhú cuan chí ra.

¹⁰Vatyí ra Abraham nyatú maa ra noo ñuu vaha ca cha cucuhva Nyoo chí ra, ta maa Nyoo chacun cuhva ñuu cuan ta maa ra savahá ra, ta chicha cimientu tyihi ra chaha.

¹¹Ta suri chinq̄ iñi tucu cu Sara cha catyí Nyoo chí ña cha cucoo sehe ña. Ta vasi cha chahnu xaan ña, soco chahá Nyoo fuerza ra chí ña, ta chicoq̄ sehe ña. Tyicuan caa cuví vatyí chinq̄ iñi cu Sara cha catyí Nyoo chí ña. ¹²Yucuan chaha vasi cha nyañaa quiví cha cúvi ra Abraham, soco chicoq̄ sehe ra. Ta yahá cuan cuaha xaan ñáyivi cacu cha cuví ñu tata ra. Tari cha cuaha tiñoo andivi, ta tari cha cuaha niyiti yuhu tyañuhu, vatyí ña cuví nacahvi yo.

¹³Tandihí ñu cuan cachihí ñu cha ni cumañi ca naquehen cuenda ñu cha catyí Nyoo tyi cuhva ra chí ñu. Soco vasi ta naquehen cuenda ca ñu ta chihí ñu soco nyehe cachi

vaha ñu chihin cha chinó iñi ñu. Ta sii xaan cuñí ñu. Ta chihin cuan cutuñí iñi ñu ta cahán ñu tuhun vatyí noo ñu yahá ri siqui ñuhu ñayivi ihya cuví ñu. ¹⁴Vatyí ñu cacahán tyehe caa, cuñí chi catyí vatyí ni nanducú ñu noo nu coo ñu. ¹⁵Tyehe ta chicá ca xiñi ñu ñuu nu quitá ñu, totyehe cuví cunuhu ñu nyicuan. ¹⁶Soco vatyí cuñí ñu noo ñuu vaha ca, o cuñí chi catyí nya gloria, yucuan chaha Nyoo ña cucahan nuu ra cha cuví ra Nyoo ñu. Vatyí cumí ra noo ñuu nu cuví coo ñu.

¹⁷Ta cha cuenda cha chinqo iñi ra Abraham chi Nyoo, yucuan cuenda quichaha ra nu cahan Nyoo ta tyaa ra cuhva cha cahñi ra chi sehe mañi ra ra Isaac, quivi nducu nyehe Nyoo chi ra tu ndicha cha chinó iñi ra, vasi suri maa Nyoo catyí ra ¹⁸vatyí cuaha xaan ñáyivi cucuvi tata ra chihin ra Isaac cuan. ¹⁹Soco ña yuhvi ra Abraham cuacuhva cuenda ra sehe ra chi Nyoo, vatyí chitó ra vatyí Nyoo, iyó tunyee iñi chi ra nyacua nya cha sanandotó ra ndiyi. Ta tari quivi sanandoto Nyoo chi sehe ra, vatyí cha nyaá cha cua cahñi ra chi ra, ta nacuhva Nyoo chi sehe ra chi ra inga chaha.

²⁰Ta ra Isaac chinqo tucu iñi ra chi Nyoo. Ta yucuan chaha catyí ra vatyí sehe ra, ra Jacob ta ra Esau, cuñihi ra cha vaha nu cuahan ca chi. ²¹Ta ra Jacob chinqo iñi ra chi Nyoo, cuhva cha cua cúvi ra. Ta catyí ra vatyí tahan tahan sehe ñañi ra, sehe ra José, cuñihi ra cha vaha. Ta sacahnú ra chi Nyoo nu nanyaá ra chihin yutun cha tuví ra. ²²Ta ra José ñandihí, chinqo iñi

ra chi Nyoo, ta catyí ra, cuhva cha cua cúvi ra, vatyí ñu Israel, ñáyivi chi ra, cu quita coyo ñu ñuu Egipto cuan nu cuahan ca chi. Ta sandoo ra tyiño chi ñu, vatyí na naquehen ñu yiqui ra quivi quita ñu ñuu cuan.

²³Cha cuenda cha chinqo iñi sutu ra Moisés ta sihi ra chi Nyoo, yucuan chaha quivi cacú ra, nyehe ñu tyi noo cha lee tyaqui xaan cuví ra. Ta yihí iñi ñu cha cusacacu Nyoo chi ra ta ma cúvi ra, vasi catyí rey cuan vatyí cúvi ndii ra cuatyaa. Ta ña yuhvi ñu ta tixehe ñu chi cue uñi yoo. ²⁴Ta ra Moisés tucu, chinqo iñi ra chi Nyoo. Ta quivi cha chahnú ra, ña cuñi ca ra cha cuvi sihi ra chi ñaha sehe rey ñuu Egipto cuan. ²⁵Ta ni ña cuñi ra ndoo ra ñuu Egipto cuan vatyí cusii iñi ra o cunyacuvi ra cha quiñi caa. Vatyí chitó ra tyi tuhun iin yaha ri cuví cuan. Soco vaha taxin ca cuñi ra nyehe ra tindoho chihin ñáyivi cuenda Nyoo. ²⁶Ra Moisés, vaha ca cuñi ra cha nyehe ra ticahan nuu cuenda ra Cristo vatyí cahnu ca cha tyayii cuví cuan chi maa ra ta ñima ca tandihí cha tyayii cha iyó ñuu Egipto. Vatyí chitó ra tyi cua cuhva Nyoo cha vaha chi ra. ²⁷Ta cha cuenda cha chinqo iñi ra Moisés chi Nyoo, ta quita ra ñuu Egipto, ta ña yuhvi ra cha cuxaán rey cuan. Ta sanyee xaan ra iñi ra. Tari cha vatyí nyehe ra chi Nyoo cha ña nyehé yo.

²⁸Cha cuenda cha chinqo iñi ra Moisés chi Nyoo ta sanducahnú ra vico cha cahñi ñu noo mbee luhlu, ta tachí ra nacahyu ñu niñi tí yuvehe ñu, tacuhva vatyí ma cahñi ángel Nyoo chi ni noo sehe nuu ñu Israel. ²⁹Ta cha cuenda cha

chingo iñi ñu Israel chi Nyoo ta yaha sava ñu Tyañuhu Cuaha, tari cha yaha ñu noo ñuhú ityi. Ta cuhva cha cacuñi tucu ra Egipto cayaha ra, ña cuvì yaha ra vatyì nacasi Nyoo tyañuhu cuan siqui ra ta cachihì ra chichi ndutya cuan.

³⁰Ta cha cuenda cha chingo iñi ñu Israel chi Nyoo, ta chico ñu ucha tahan chaha chata ñuu Jericó, ta tandihì cuì maa nu sama chata ñuu cuan canacojo. ³¹Ta cha cuenda cha chingo iñi cu Rahab, ñaha cata iñi cuan, chi Nyoo, ta ña chihì ña ìin ri chihin ñu ñuu ña, ñu ña quichaha chi Nyoo, vatyì maa ña, tyinyee vaha ña chi ra Israel, ra chahan coyo chinyehe tatu cuvì chasaha ra tinyaa ra ñuu ña chi ra nyacá ñaha ñuu cuan.

³²¿Ñáá ca cha cuvì catyì vityin? Cuaha xaan cuhva cucuñi chi chii tatu cahín tuhun ra Gedeón, ra Barac, tuhun ra Sansón, ra Jefté, ta tuhun ra David, ta ra Samuel ta tuhun ra cacuvì profeta Nyoo ta cha naha. ³³Cha cuenda cha cachingo iñi ra chi Nyoo, ta yihí ra saha ganaa ra chi inga ñuu nahnu. Ta yihí ra vaha xaan chinyacá ñaha ra ñáyivi cuenda Nyoo. Yihí ra ñihì ra cha catyì Nyoo tyi cuhva ra chi ra. Yihí ra chasì ra yuhu ndicaha. ³⁴Yihí ra ña cayu ra chihin ñuhu chichi horno nu catyihì ra chi ra. Yihí ra cacu ra cha cahni ñáyivi chi ra chihin mityi. Yihí ra cha ñahri fuerza chi ra, soco candunyeë ra, ta chiyò xaan fuerza chi ra chichi cuatyì cuan, ta cuvì chasaha ra chi sindaro cuenda ñu xaan iñi chi ra. ³⁵Ta chicojo suhva ñusihi, nandoto ñáyivi chi ñu.

Ta inga ñáyivi chihì ñu chihin cha cuaha xaan tindoho sanyehe ñáyivi chi ñu, soco ña sandojo ñu chi Nyoo vasi chihì ñu cha catyì ra, vatyì chitó ñu, vatyì tatu ma sandihì ñu cha chinó iñi ñu chi Nyoo, cunandoto ñu ta cucoo ñu noo ñayivi vaha xaan ca. ³⁶Ta inga ñu nyehe ñu tindoho cha cahán nyaa ñáyivi chi ñu ta cañi ñu chi ñu. Ta inga ñu chinuhñi ñu chihin cadena ta cuahan ñu vehe caa. ³⁷Yihí ñu chihin yuu chahñi ñáyivi chi ñu. Yihí ñu chahnya ra chihin tierra chi ñu. Yihí ñu nducu nyehe ñáyivi chi ñu. Yihí ñu chihì ñu cha chahñi ñáyivi chi ñu chihin mityi. Yihí ñu chica noo ñu ta ñahri sahma ñu. Chihin ñii mbee ri ta ñii ndixihyu ñihno ñu. Ndahvi xaan ñu. Ta cuihya xaan cuñi ñu. Ta sanyehe ñáyivi cha ña ñohó nuu Nyoo tindoho chi ñu. ³⁸Ta ñáyivi ña ñohó nuu Nyoo ña nañá ñu cha cu ìin ri ñu chihin ñáyivi ndahvi cuan vatyì vaha ñu nuu Nyoo. Chica noo ndahvi ñu ityi chiqui ndii, ityi yucu. Chiyò ñu chichi yavi yuu ta yavi ñuhú. ³⁹Tandihì maa ñu vasi cahán vaha Nyoo siqui ñu cha cuenda cha chinó iñi ñu chi ra, soco ña ñihì ñu cha catyì Nyoo cha cuhva ra chi ñu. ⁴⁰Vatyì natyaa ra cuhva, cha cuhva ra nonga cha vaha ca chi ñu vatyì natyihì ra cuenda chi yo ta ìin ri cutahan chi chi yo chihin ñu cuan.

**ìin ri chi ra Jesús tahán
chi cuita iñi yo**

12 Tandihì ñáyivi cuan quita vaha ñu vatyì chingo iñi ñu chi Nyoo. Ta vityin chihin cuan sanduni ñu iñi yo ta nyatú

ñu nyehe ñu tatu quita vaha yo. Yucuan chaha cuñí chi cha sacuachiyo xiin yo tandíhi cha sayangá chi yo, tandíhi cuatyí cha nyicón chi yo. Ta chihin cha cama iñi yo ta cuhun yo ityi nuu ca chihin Nyoo. ²Iin ri chi ra Jesús quíhi nuu yo, vatyí maa ra chahá ra cha chinó xaan iñi yo chi Nyoo, ta chahá ra tandíhi cuhva tahán chi chino iñi yo. Ta cha ni cumañi ca cúvi ra, chitó ra vatyí sii xaan cucuvi chi ra cha yaha cúvi ra. Yucuan chaha, chahá ra cha cahñi ñáyivi chi ra. Ña quichahá ra ticahan nuu cha cúvi ra tari chihi noo ra iyó cuatyí, ta vityin nyaá ra chiyo vaha Nyoo gloria.

³Saha ndo cuenda cuhva chiyo ra Jesús, vatyí nyehe xaan ra tindoho sahá ñu iyó cuatyí. Yucuan chaha ma cutatu ndo, ta ma ndu uvi iñi ndo cha nyicón ndo chi ra. ⁴Vatyí nyoho ta chaa ca ndo nyehe ndo tindoho cha cuenda cha cañi tahan ndo chihin cha quiñi caa, tari nyehe ra Cristo tindoho ta chihí ra. ⁵¿Atu cha naá iñi ndo tuhun chahá Nyoo chi ndo tari cha sehe ra chi ndo?

Catyí ra tyehe caa nu tutu ra:

Sehe luhli, ma cuxaun tatu saquehen ityi chuun.

Ma nducuihya iñun tatu cahín chuun.

⁶Vatyí ra saquehén ityi yuhu chi, chaha cha cuñí chi ra, vatyí sehi cuví chi ra, catyí Nyoo.

⁷Cunyee ndo ta cutuhva ndo tatu saquehen ityi ra chi ndo, vatyí Nyoo, sehe vaha ra sahá ra chi ndo. Vatyí tandíhi ra iyó sehe, saquehén ityi ra chi sehe ra. ⁸Vatyí tatu ña saquehén ityi Nyoo chi ndo, ñima

sehe vaha ra cuví chi ndo, soco tatu saquehén ityi ra chi ndo, sehe vaha ra cuví chi ndo. ⁹Ta siin ri, ta nyihi yo, sutu yo ihya ñáyivi saquehen ityi ra chi yo, ta saha yo ñáyivi chi ra. Ta nyaca cuví Nyoo, tahán tucu chi saha yo ñáyivi chi Sutu yo Nyoo, tyicuan ta coo añima yo tyicuan ri maa. ¹⁰Sutu yo cuenda coño ñuhu yo, saquehen ityi ra chi yo suhva ri quívi, yoso cuhva cha cuñi chi. Soco Nyoo saquehén ityi ra chi yo cha cuenda noo cha vaha ca chi yo, vatyí sa ii ra chi yo tari maa ra, cha ii ra. ¹¹Ndicha vatyí ña tahán iñi yo cha ndohó yo vatyí uhvi chi yo. Soco chihin cha ndoho yo, cutuhva yo coo yo noo ñáyivi vaha.

Yica xaan tatu ma quichaha yo cha catyí Nyoo chi yo

¹²Yucuan chaha sandunye ndo iñi ndo, ta ma quíhi iñi ndo cha ma cuvi cunyicon ndo chi ra Cristo. ¹³Ta nanducu ndo cuhva coo vaha ndo chihin Nyoo, nanducu ndo cuhva caca ndoo ndo chihin ra. Tyicuan ta maa ra cuhva ra fuerza chi ndo ta nduvaha ndo nuu Nyoo ta ma cucuihya ca cuñi ndo.

¹⁴Sañiñi ndo coo vaha ndo chihin tandíhi ñáyivi. Ta coo ndo noo ñáyivi cachi. Vatyí tatu ña cachi iyó yo, chihin Sutu Mañi yo Nyoo, ma nyehe yo chi ra. ¹⁵Saha ndo cuenda chi ndo coto yíhi ndo, ma ñihi ndo tumañi iñi cha iyó chi ra. Ta saha ndo cuenda chi ndo, coto cuvi ndo tari noo yutun cha chahá chiti uva, ta coto quehen ñáyivi cha caá ndo ta tiví ñu nuu Nyoo. ¹⁶Ta ni noo ndo ta maa coo ndo chihin ñáyivi tatu ñima ñasihi ndo o yii ndo cuví.

Ni ma cuñi ndo vatyi tuhun Nyoo noo cha ñima ri tuhun cuví, vatyi tyicuan caa sacuví ra Esaú, vatyi chihin noo nyayu ri, xico ra tandihi cha tahán chi chi ra cha cuví ra sehe nuu sutu ra. ¹⁷Ta chitó ndo vatyi cha yaha cuan ta cuñi ra Esaú cha nasoco sutu ra chi ra, soco ña cuví ca. Ta vasi chacu vavaha ra, soco ña ñihi ca ra cuhva nasama ra cuhva cha chinyacuví ra.

¹⁸Ta maa ndo cha ndo nuu nyaá Nyoo soco ñima tari cha ñu Israel cuan quivi chahan ñu noo yucu nu cuví yucu Sinaí. Ta yucuan nyehe ñu cayu ñuhu, ta nduña iñi, ta ñihi xaan tatyí. ¹⁹Ta chiñi ñu nativi cutu cuihya ta chahan Nyoo chihin ñu. Ta ñu cha chiñi tuhun cahan ra, chacu ndahvi ñu tacuhva ma cahan ca ra chihin ñu, vatyi yuhvi xaan ñu ²⁰cha cuenda vatyi ña cunyeé iñi ñu tuhun cha chaha ra chi ñu. Vatyi catyí ra tyehe caa: “Tatu quihvi noo ñáyivi, cahñi ndo chi ñu chihin yuu o chihin lanza, cuví ri ñu ñáyivi o quití”, catyí Nyoo chi ñu. ²¹Yuhvi xaan ñu cha nyehé ñu yucuan, vatyi nyacua nya ra Moisés ta catyí ra: “Ñihi xain chihin cha yuhví”, catyí ra.

²²Soco yoó ña nyehe yo cha yuhvi cuan vatyi noo yucu cha nañi Sión nu cuví ñuu Nyoo nyitó cha yo. O cuñi chi catyí ñuu Jerusalén cha nyaá andivi, nu nyicú cuaha mil ángel. ²³Candú iin ri yo vatyi sacahnu yo chi Nyoo vatyi ndú iin ri tandihi ñu cha cuví sehe Nyoo cha nyicú sivi nu tutu nya andivi. Ta cha yo nuu Nyoo cha cuví juee chi tandihi ñáyivi. Iin ri nyicú yo chihin añima ñu vaha cha

sanduvaha maa Nyoo. ²⁴Ta natuhva ndo chi ra Jesús ra cuví ra cahán chaha yo vityin cha natyihí tahan Nyoo tuhun chaa chihin yo. Ta chati ñiñi ra. Ta ican chi chahá noo cha vaha ca ta ñima ca cha chahá ñiñi ra Abel. (Vatyi ra Abel chihí ra ta tachí tuñi Nyoo chi yañi ra. Soco chihí ra Jesús, ta iyó tucahnu iñi cuatyi yo.)

²⁵Yucuan chaha saha yo cuenda coto ma quichaha yo chi ra cha cahán chihin yo. Vatyi ñu Israel cuan, ña cacu ñu cha ña cuñi quichaha nu cahan Nyoo quivi cahan ra nu cuví yucu Sinaí ihya siqui ñuhu ñayivi. Ta nyaca cuví yoó, ma cuvi maa cacu yo tatu nacuhva yo chata yo chi ra cha cahán chihin yo nya andivi vityin. ²⁶Quivi cuan ndusu Nyoo sacanda chi ñuhu ñayivi. Soco vityin catyí chi tyehe caa: “Noo ri ca chaha cusacande ta ñima ñuhu ñayivi ri, soco andivi ñandihí.” ²⁷Ta cha catyí ra vatyi cusacanda ra nonga chaha, cutuñi iñi yo vatyi cucuachiyo tandihi cha nyaá ii ri cha savaha Nyoo. Ta cundoo cha ma cuvi nacanda. ²⁸Nu chahá Nyoo cunyaa yo chihin ra nu nyacá ñaha ra, ma nacanda cuan. Yucuan chaha na nacuhva yo tyahvi nyoo chi ra, ta sacahnu yo chi ra chihin cha ñi iñi yo, ta chihin cha saha yo ñáyivi chi ra, vatyi tyicuan caa tahán iñi ra. ²⁹Vatyi Nyoo cuenda yo, cuví ra tari noo ñuhú cha chahmí tandihi, ta tyicuan caa cusanaa ra tandihi cha ña vaha.

Na coo yo cuhva tahán iñi Nyoo

13 Ma sandihi ndo cha cuñi ndo chi tandihi ñu yihí

cuenda Nyoo tari cha tahan ndo chi ñu. ²Ta ma naa iñi ndo cha cuvaha ñáyivi cuví ndo chihin ñáyivi cha chaá vehe ndo. Vatyí iyó chaha cha cuenda cha vaha ñáyivi cuví ndo, ta chahá ndo nu coo ñáyivi; chi ángel, chahá ndo nu coo, ta ña tuví iñi ndo.

³Ma naa iñi ndo chi ra ñohó vehe caa tari cha ñohó tucu maa ndo vehe caa chihin ra. Ta tyicuan caa tucu ñu nyehé tindoho sahá ñáyivi. Saha ndo tyi nyehé tucu maa ndo tindoho tari nyehé ñu, tyicuan ta cundahvi cuñi ndo chi ñu ta tyinyee ndo chi ñu. Vatyí chitó ndo yoso caa uhvi chi ñu cuan tyi ñáyivi cuví ñu tari maa ndo.

⁴Cha tandaha ndo, noo cha vaha cuví. Ta nyoho cha tandahá ndo tahán chi saha ndo ñáyivi chi yíi ndo o chi ñasihi ndo. Vii coo ndo chihin tahan ndo, vatyí Nyoo cutachi tuñi ra chi ñu iyó yíi ta iyó inga ra chi ñu, o ra iyó ñasihi ta iyó inga ñusihi chi ra.

⁵Ma cuñi xaan ndo xuhun. Ndoo ndo vaha chihin cha iyó chi ndo, vatyí Nyoo catyí ra: “Ma sañe chuun ta ni ma sandoo ñihne chuun”, catyí ra. ⁶Yucuan chaha cuví catyí yo chihin cha ñi iñi yo: Sutú Mañi yo cuví ra tyinyee chii, Ma yuhvi náá cha sacuví ñáyivi chii.

⁷Ñicohon iñi ndo chi ra cayihí ndaha vehe ñuhu, ra cacahán tuhun Nyoo chihin ndo. Nacaca xiñi ndo vatyí maa ra cachi iyó ra nuu Nyoo, ta cunyicon ndo cuhva cha vaha xaan chinó iñi maa ra chi Nyoo.

⁸Ra Jesucristo ña nasamá ra. Ican ra cuví ra ta tyembu chahnu, ta

ican ra cuví ra vityin. Ta ican ra cuví ra nuu cuahan ca chi tyicuan ri maa. ⁹Ma cuhva ndo cha sandavi ñaha ñáyivi chi ndo chihin tuhun siin caa cha sañahá ñu. Vaha ca cha cu ñi iñi ndo chihin cha cuñi Nyoo chi yo, ta ñima ca tuhun cha sañahá ñu cuan: cha yica cha cachi yo. Ña tyinyee maa cuan chi ñu nyacuví tyicuan caa.

¹⁰Iyó noo arta cha cuenda yo. Nu chati ñiñi ra Cristo nu cruzi, ican cuan cuví. Ta ñu cuñi cacu chihin cha quichahá ñu ley chahnu cha quichahá ra cacuví sutu ta cha naha, ma cuví tyinyee ra Cristo chi ñu. ¹¹Ra cuví sutu cahnu cuenda ñu Israel chinyaca ra ñiñi quití Nu Ii Xaan Ca cuan cha cuenda cuatyí ñáyivi, soco coño ti chinyaca ra ityi chata ñuu vatyí cayu chi. ¹²Ta tyicuan caa tucu ra Jesús, tyaq Nyoo tyiño chi ra cha nyehe ra tindoho ta cúvi ra ityi chata ñuu Jerusalén, tacuhva vatyí sandundi ra chi yo chihin ñiñi ra. ¹³Ma cahan nuu yo nyehe yo tindoho ticahan nuu cha cuenda ra Cristo, tari nyehé tucu maa ra cha cuenda yo quivi chahán ra chicúvi ra ityi chata ñuu Jerusalén. Tari quivi cha cuahan tucu yoó ityi chata ñuu cuví chi cuan tatu ña cahán nuu yo nyehe yo tindoho cha cuenda tuhun ra. ¹⁴Vatyí ihya siqui ñuhu ñáyivi, ñahri noo ñuu cha tyicuan ri maa cucoo iyó. Soco nanducú yo noo ñuu cha cuquichi, cha yaha ndihi tuhun ñuhu ñáyivi ihya. ¹⁵Yucuan chaha vityin cha ñohó ra Cristo aña yo, tahán chi cha saniñi yo ta sacahnu yo chi Nyoo chihin yaa, ta chihin cha cahan yo tuhun

cha cahnu cuví ra. ¹⁶Ta ma naa iñi ndo cha sacuví ndo cha vaha. Ta tyinyee ndo chi tahan ndo chihin cha iyó chi ndo, vatyí ican ihya cuví cha tahán iñi Nyoo.

¹⁷Quichaha ndo tuhun cahán ra casaquehén ityi chi ndo, ta cūhva ndo chi ndo cunyaca ñaha ra vatyí nyicú ra tyiño casahá cumi ra añima ndo. Ta coo quivi cutahan chi cunacuhva ra cuenda tyiño casahá ra chi Nyoo. Ndūcu ndo cūhva sacuvi ndo cha vaha, tacuhva vatyí chihin cha sii cuñi ra cūhva ra cuenda ndo nuu Nyoo, vatyí tatu ña sacuví ndo cha vaha, chihin cha cuihya iñi ra cūhva ra cuenda ndo, ta nyoho, ma quita vaha ndo nuu Nyoo.

¹⁸Vaha cuñí añima ndi chihin Nyoo, ta cuñí ndi cha cacán tahvi ndo chaha ndi vatyí cuñí ndi sacuví ca ndi cha vaha. ¹⁹Ta chiquén noo tumañi iñi chi ndo cha cacán tahvi ndo chiin chahi tacuhva vatyí nacuhva Nyoo cuhin cucunyai cha numi ri chihin ndo inga chaha.

**Nu ndihí cahan ra ta nacuhva
ra nocumi chí ñu**

²⁰Nyoo ican ra iyó cha taxi chi ra, ican ra sanandotó ra

chi Sutu Mañi yo Jesucristo, ra cuví ra sahá vaha cuenda chi yo tari cha cuví yo mbee sana ra. Ra Cristo chatí ñiñi ra, ta chihin cuan natyihí tahan Nyoo tuhun chaa cha ma ndihi ca maa chihin yo. ²¹Na cūhva Nyoo cha vaha chi ndo tacuhva cuvi sacuvi ndo cūhva cuñí ra. Ta na sacuvi maa ra cha cuñí maa ra cha cuenda ra Jesucristo chihin tandihí maa yo. iNa sacahnu yo chi ra Cristo tyicuan ri maa! iNa cuvi chi tyicuan caa!

²²Yañi, chacú ndahvi nuu ndo, na cunyee xaan iñi ndo chihin tuhun cha chahí ihya chi ndo, vatyí ña cuaha xaan tyai nu tutu ihya chi ndo. ²³Coto ndo vatyí ra yañi yo, ra Timoteo, cha quita ra vehe caa. Ta tatu nachaa ra cha numi ri, cūhun ra chihin, na cūhin cunyehi nu nyicú ndo.

²⁴Cūhva ndo nocumi chi tandihí ra sañahá chi ndo, ta chi tandihí ra yañi yo cuenda ra Cristo. Ñu Italia ihya, tachí ñu nocumi chi ndo.

²⁵Ta Nyoo na nasoco ra chi tandihí maa ndo. Ta na cuvi chi tyicuan caa.